



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

India nung nisung 781 dak  
Omicron putetogo

Mikel Arteta dak  
tanaben Covid-19 putet

VOL. XIX NO. 79 (ADOK 79)

DIMAPUR

YANGTEPNÜ (THURSDAY)

LUCHII (DECEMBER) 30, 2021

₹ 5.00

Molnupiravir mozü shiranger 13,000 dak tendangtsü



**New Delhi, December 29, 2021 (Agencies):** Mezüngbuba oral anti-viral Covid süngjang Molnupiravir India nung rongdak mapang amshitsü temelaba agütsüogo.

Iba mozü ya shiranger nisung 13,000 dak tendangtsü aser company temi sorkar nem 'clinical trial' osang agütsütsü.

India nung Torrent, Cipla, Sun Pharma, Dr. Reddy's, Natco, Mylan, Hetero, Optimus dena pharmaceutical company 13-i Molnupiravir mozü yanglutsü.

Iba mozü ya US nung amenoka aliba biotechnology company Ridgeback

Biotherapeutics-i US Pharma company Merck den yaritepa yanglu.

Drug Controller General of India (DCGI)-i shiranger nem Molnupiravir mozü ya anogo pungunü nung anogoshia anaben tashi 800 milligramme agütsütsü shiogo.

Molnupiravir ya arishi küm 18 ser teküpokpur nembo magütsütsü ta DCGI-isa tetuyuba agütsü.

DGCI-isa iba mozü ya Covid-19 noktanga mozü ka ama mamshitsü aser tanur bena aliba tetsürtem nem magütsütsü tenokdangba agütsüogo.

COVID-19 Nagaland: 3 dak putet & 8 taneptsü angu

**Kohima, December 29, 2021 (TYO):** Nagaland nung Bodbarnü nisung 3 dak COVID-19 putet aser nisung 8 taneptsü angu.

Tanü Dimapur nung nisung 3 dak putet aser parnok züngsema nisung ajak agi 32,188 kümogo.

Külen, taneptsü angurtemji Dimapur nung nisung 6 aser Kohima nung nisung 2 lir.

Tang tashi nung nisung

30,347 taneptsü nguogo aser ibaji taneptsü angur 94.28% lir.

Tang nisung 70 anepaludar saka parnok rongnung nisung 58 dakbo shirangba yimya kecha mali.

December 22 tashi nung nisung 759,123 nem COVID-19 vaccine indang dose 13,32,991 agütsüogo. Health department-i December 23 nungibo vaccine agiba indang osang magütsür.

NE nung New Year jakdang tsüngsang majungtsü

**Guwahati, December 29, 2021 (Agencies):** Taruba ghonda 48 tsüngda India kübok Northeast kübok tesem kar nung tzünglu kanga arutsü.

Bodbarnü West Bengal aser Sikkim nung tsüngmok atena tzünglu arutsü, tsüngpret prettsü aser rü alatsü ta India Meteorological Department (IMD)-i metetdaksü.

IMD-isa Bodbar aser Brihostibar anogotem Arunachal Pradesh, Assam, aser Meghalaya nung kasa tsüngsang ajurutsü shiogo.

State asem nung December 29-30 anogotem kasa tsüngsang

Hokolbarnü item state tem nung tzütsü kanga alatsü. Bodbar aser Brihostibar anogotem item state tem nung 'yellow watch' agütsür ta IMD-i ashi.

Northeast kübok tesem aika nung minimum temperatures ji normal nungi 2-5 degrees Celcius tashi asütsü akok.

December 28 nü Assam aser Meghalaya kübok tesem kar nung minimum aser maximum temperatures ji 1.6 nungi 3 degrees Celcius tashi liasü.

## Indian Army Court of Inquiry-i Oting semdang Konyak nungeri Army den amalitep makar

**Dimapur, December 29, 2021 (TYO):** Indian Army-i Mon lendong bushisüngdangtsü atema tentetba Court of Inquiry-i Bodbarnü Oting yim semdangogo.

Indian Army nung Major General kati aniba Court of Inquiry-i lendong atalokba Tiro-Oting tesem semdanga liasü.

Parnokisa tatalokba osang tali jangjashitsü aser metettsü atema kuli agütsürtem den ajurutep.

Bodbar nikongdang 1:30 ako nungi 3:00 ako tashi Tizit Police Station nung inquiry team-i nübertem den ajurutep.

Parnok rongnung civilian, police aser yirurtem anepaluba doctor tem dena liasü, ta Indian Army sangdong ka nung ashi.

Kuli agütsürtemi Phone, SMS mesüra Whatsapp Messenger ajanga mesüra video yoktsü akok ta Army-i lephsia metetdaksüogo.

"Assam nung aliba Dinjan Military Station nung Inquiry team tsüngdong tonga oa osang agütsütsü akok" ta parnokisa ashi.

Court of Inquiry ajanga mapa kanga kara inyakdar aser tekaratiba nung tembangtsü meranger, ta Indian Army-isa metetdaksü.

Ano tanga osang ka ajanga angazükba agi, iba tesem nung alirtemi CoI den amalitep malitsü lemtetba nungi masetshii noktaker.

Tanü Mon district nung civil aser police administration-i Army CoI meina liasü. Iba mapang December 4 lendong atalokba nung shilem agir sepaia asem tashi aden ta osang ajanga ashi.

**Konyak nungeri Army den meyariteptsü:**

Konyak Union (KU)-i lemtetba ama tasür kinungertem mesüra village council züngsem shingaia CoI züngsemtem den majurutep.

Temeten mangu tashi Army den amalitep kecha malitsü aser Mon district nung civil society züngsem shingaia CoI telok den majuruteptsü, ta Konyak Union president Howing Konyak-i ashi.

(Maneni tapak 10 nung...)

## ENSF-i Meghalaya CM nem Oting kulitem agütsü

**Dimapur, December 29, 2021 (Agencies):** Eastern Naga Student Federation (ENSF)-i Meghalaya chief minister Conrad Sangma nem memorandum ka den Oting nung nisung tepsetba indang kulitem agütsüogo.

ENSF teshimtet telok kati

Mongulbar nikongdang Dimapur nung Meghalaya chief minister Conrad Sangma den ajurutepa liasü. Conrad Sangma-ia Armed Forces Special Powers Act (AFSPA) agientsü takhangba nungi masetshii noktaker metetdaksüogo.

"Northeast nunger ama onoki AFSPA agientsü maneni akhanger" ta Meghalaya CM Conrad-i Dimapur nung ashi.

AFSPA ya Nagaland nungi dang masü saka Northeast ajungalen nungi agientsüla, ta paisa nenshia ashi.

## Chumoukedima district nung pelashishia adentsü: Diphupar VC

**Dimapur, December 29, 2021 (TYO):** Nagaland state sorkari Chumoukedima district kübok Diphupar yim dendaktsüba pelashishia agizüker ta Diphupar Village Council (DVC)-i metetdaksüogo.

December 29, 2021 nü DVC-i councilors, GBs,

VDBsm DNYO, DNWO, DNSU aser kin telok balala den külem senden ka amendang iba telemtetba agi, ta DVC Chairman Ghuzui Shohe aser Joint Secy. Tejove Kezo nati sangdong ka nung ashi.

Senden nung adenertemisa district administration den

akokba tashi yariteptsü bangjemtep tenatisa ashi.

Chumoukedima district kübok aliba yim ajak longjemtsü aser terenlok mapa inyakba nung sorkar den yariteptsü mepishia metetdaksür, ta Diphupar Village Council sangdong nungsa shia lir.

## PM Modi-i Jan 1 nü aluyimer bank account nung sen enoktsütsü

**New Delhi, December 29, 2021 (Agencies):** Prime Minister Narendra Modi-i January 1, 2022 nü Pradhan Mantri Kisan Samman Nidhi (PM-KISAN) scheme kübok installment tasembuba agütsütsü.

Iba sentong ya video conferencing ajanga agitsü ta Prime Minister's Office (PMO)-i metetdaksü.

Prime Minister-i aluyimer kibong crore 10 den teimba indang account tem nung Rs 20,000 crore tema enoktsütsü ta parnoki ashi.

PM-KISAN scheme kübok aluyimer kibong shia nem küm nung Rs 6,000 agütsür. Iba ya küm nung pezüben lemsar aluyimer indang bank account nung shilem shia Rs 2,000

enoktsür.

Tang tashi nung iba scheme kübok Rs 1.6 lakh crore enoktsüogo, ta PMO-isa ashi.

January 1, 2022 nü sentong nung PM Modi-i farmer producer organizations (FPOs) 351 nem Rs 14 crore tema equity grant enoktsütsü. Iba ajanga aluyimer lakh 1.24 den tema ajangzüksü.

## Jharkhand nung petrol litre nung Rs 25 ajemtsü

**New Delhi, December 29, 2021 (Agencies):** Jharkhand Chief Minister Hemant Soren-i petrol litre nung Rs 25 ajemtsü osang metetdaksüogo saka iba tajangzük ya two-wheeler kiburtem nem dang agütsütsü.

"Petrol-diesel jenjang tupet

atur. Iba khuret ya sensaker aser middle class dak kanga kongshir. Iba jagi state sorkari two-wheelers atema petrol litre nung Rs 25 ajemtsü lemtet" ta CM Hemant Soren-i ashi.

January 26, 2022 nungi Jharkhand nung petrol jenjang ajemtsü, ta pai metetdaksü.

Taküm November ita Centre-i India ajungalen totzü jenjang ajema liasü. Iba sülen state balalai aser talisa BJP-i sorkar yimsü asüba state temi totzü jenjang ajema liasü.

Centre sorkari petrol litre nung Rs 5 aser diesel litre nung Rs 10 excise duty ajema liasü.

## Chuchuyimpang Kaketshir Telongjem tenzüker küm 75 abensaogo



MLA Dr. Ngangshi K Ao-i Chuchuyimpang Kaketshir Telongjem platinum jubilee nüngtem azüngba nüngshilung ka sayatsür külen Chuchuyimpang putu yimsüsür aser CKT ketdangsürtem noksa nung angur. Chuchuyimpang, 29th December, 2021.

**Chuchuyimpang, 29 Dec (TYO):** Chuchuyimpang Kaketshir Telongjem tenzüker küm 75 ajungba platinum jubilee sentong "mangdangsen" omen nung ajemdaker Dec 28 & 29 anogo ananü Yimkümshiba tesem Chuchuyimpang nung takok ngua mungogo.

Sentong nung tongti tejaoker, Dr. Ngangshi K Ao-i jembidang, lanurtem ya tarutsü senmangtem lir, anungji, parnok asoshi khuret abentsübaji kanga tongtibang lir, ta metetdaksü.

Jubilee ya tesüibatem reprangshiba den tarutsü atema jembitsüba mapang ka lir. Mangdang makara kin ka samar ta ashiba ama ibaji asen atema lensanir ka südaksütsü asoshi pai ayongzüker. Tanü alima ya balaka renlokogo, anungji, tang nungi küm 25 meraa aotsü atema nükla tajung ayutsüla, aji mesüra asenoki alima tsüngkang metema moutettsü, ta paisa ashi.

NITI Aayog ajanga India nung state rongnung Nagaland ya teküboktiba state ta sangdongogo. Asen sülen statehood angurtemi asenok ajateta ogo, ibai tebilemdangtsü tulu lir, iba ama tensa ka nung tanü asenok lenisüba kanga nungdaka lir, ta paisa lanurtem den khuret kar lemsatsep. Tanü joko kechi azüing ta masü saka kechi inyakteter ta asüba putu lir, ta paisa shisem.

Alima melenshidaksünüra, mezüngbuba pei yimsüng nungi temelenshiji tenzüksüla, ta paisa ashi. Kechisarena ajak ya Tsüngrem dak dang tembanger, shisatsü süshia, tashitemetet süshia aser tangatetba süshia ajakji Pa tsübuba nungi dang tenzüker, anungji, lanurtemi iba tangatetbaji bushitsü asoshi paisa tayongzüker agütsü.

DABA Counselor, Dr. N. Moa Imsong-i "mangdangsen" onük nung ajemdaker jembidang, mangdang tasen

ayuba jagi taküm nung tetezü agütsür, iba jagi len sayur, iba jagi nisung ka ajungmesor, anisüngzüker agütsür aser taküm nung nükjidong ataloktsür, ta metetdaksü.

Paisa mangdang ataloktsü asoshi teinyaktsü kar lemsatsepang, arogoi samaa alirtem anitenbaji mezüngbuba teinyaktsü asütsüla, kija taküm shia tangari akhümtsübuba kaka akümtsütsüla, business ajak nung ochi seret amshitsüla, chiyimer dang masü züsenteter akümtsüla, kechi mapa inyakdir ajak nung nentaka inyaktsüla, aser yimden - loktiliba - rongsenketzüing aser tanelaren tsütsü mongin/asameyanger adoktsü nükla ayutsü asoshi tayongzüker kar agütsü.

Tesülen sobaliba sentong ka agia liasü aser iba sentong nung sobaliba tetoktepba tapu balala ayonga agi. Mokochung SP Kr. Aotula T Imchen IPS ajanga jubilee sentong shibangtsü.

## Assam CM anema MP Abdul Khaleque-i FIR benok

**Guwahati, Luchii/Dec. 29 (Agencies):** Assam Chief Minister Himanta Biswa Sarma-i sangdong ka nung Gorukhuti nung atalokba ya mangyangba mapa ka lir ta ashiba mechi Congress telok nungi Parliament züngsem Abdul Khaleque-i Sarma anema Bodhbarnü FIR ka benoka liasü.

Constitution nung tezüngzüktep agiba nung ajemshia Chief Minister Himanta Biswa Sarma-i kin sentsü temai adoka kembi, ta MP ajanga ashi.

"Gorukhuti azüingtetba mapang Moinul Hoque aser Sheikh Farid tepset. Gorukhuti nung alirtem indang ki mitsü kuma rongdoktsü aser aser itemji

mangyangba ka lir ta ashi," ta pai ashi.

"Himanta Biswa Sarma-i nisung tepsetba aser mapa tamajung inyakba atema medenja jembitsüba kisung masü, iba ken o ya Gauhati High Court nung metembangir lir, saka pai alakyia oa inyakyim ya ajanga kin tsüngta telemsa adoktsüsa jembia aser yangji aliba Muslim nung dak tenük yokba ka lir," ta FIR nung shia lir.

Gorukhuti nung Human Rights nung aibelenba sülen kin temeja ka dak tenük yoker Chief Minister-i tim masüba o jembia, ta Khaleque-i ashi.

"CM ajanga Muslim nung sempatsüsa jembiba ajanga

sorkari taa agütsür yokba noksa tangtoker kati Moinul Hoque temang nung ajemshi, shiba police temi khar tasür longdaka liasü," ta FIR nung shia lir.

"Gorukhuti nung atalokba lendong ya 1983 atema mangyangba ka ta Chief Minister-i jembiba ajanga state nung kin temeja ka anema nüburtemi maneni mapa tamajung inyaktsü ajungmesor amai lir," ta MP ajanga FIR nung shia lir.

India nung tamangba yimsü tsütsü tesempatep tali akumer, ta yangji shia lir. Khaleque-i ashiba agi, pa parliament session asoshi Delhi nung oa aliba mechi FIR benoktsü anogo 19 agi menua liasü.

NLSF lenirtemi Bar Council secretary Kulesh Goswami ajuru **Dimapur, Luchii/Dec. 29 (TYO):** Nagaland Law Students' Federation (NLSF) tir, C. Talimoa-i anir lenirtemi December 28, 2021 nü Guwahati nung Assam, Nagaland, Arunachal Pradesh, Mizoram aser Sikkim indang Bar Council secretary, Kulesh Goswami ajurua liasü, ta sangdong ka ajanga ashi.

State Bar Council kübok Kohima Law College nungi law graduates tasentem tenüing zülüokba nung timtem ajuruba indang NLSF ajanga lemsatapa liasü, ta ashi.

State Roll nung Kohima Law College nungi tasen graduate asürtem zülüokba nung menuba ajanga parnok wadang nung renloka aoba nung timtem ajurutsüsa jenjang nung yutsür.

Kaketshirtemi timtem ajuruba indang angateta jembiba mapang State Bar Council

ajanga Bar Council of India nungi temelaba agiba sülen aser Kohima Law College nungi law graduate tasentem tenüing zülüokba maparen tenzüksü, ta sangdong ajanga ashi.

Iba atema NLSF ajanga tekeratiba nung maparen tenzüksü asoshi Bar Council of India, New Delhi den osang agiteptsü.

Mapang shidak nung Mokochung Law College aser City Law College, Dimapur nungi law graduate tem tenüing zülüokba atema NLSF ajanga State Bar Council dang pelar, ta sangdong ajangasa ashi.

Taoba India ato kilonser Atal Bihari Vajpayee asoba anogomung bilemteta Bodhbarnü Tourist Lodge, Dimapur nung Sushasan Divas (Good Governance Day) amungdang tangokba noksa ka nung BJP Nagaland züngsemtem angur.

## Sakraba Students' Union lokti senden menogo

**Dimapur, Luchii/Dec. 29 (TYO):** Sakraba Students' Union (SSU) pur "Discover the differences" omen kübok 56 buba lokti senden ananü amenba December 29, 2021 nü tembangogo. Iba senden ya Phek district kübok Lohe Khel, Sakraba yimdak agia liasü.

Iba lokti senden tenzüker sentong nung Zaveyi Kezo, state secretary, BJP Nagaland ajanga jembiba mapang nüburtem dang human resources development tsütsü temolung agütsütsü ayongzüker liasü.

Iba atema pai tsüraburtem dang shisashir, tekolok shisatsü, temang, molungsenttsü aser loktiliba nung shilem agitetsüsa terenlok atema rongsen indoktsü ajungshia liasü.

Tanur ka rangben renloktsü ya kanga tongtipang lir, anungji tsüraburtemi pei chirtem ya lokti asoshi khuret ka ama masü saka rongsen ka ama anitetsüla, ta ashi.

Omen nung kongshia jembiba mapang Kezo-i kaketshirtem dang aibelen mesüi mera agitsü aser academic tsütsü takok angutsüsa telemtetba agitsü ajungmesoa liasü.

Pai kaketshirtem dang pei

mapa metettsü aser pei sempet jangjatettsü shia liasü.

Takok angutsü atema lenmang tatsütiba mali, anungji kaketshirtemi meranga inyaktsüla aser takok angur kaka asütsüla, ta pai ashi.

Mobile phone amshiba tajangzüker aser takoksa indang rateta ashiba mapang, pai kaketshir dang item ya nüngdak atema amshitsü ashi.

Iba sentong nung Chakhesang Students' Union (CSU) tir, Vetho Vadeo-i salem o ashi aser Central Chakhesang Public Organization (CCPO) tir, Niehiisa Ciikhamu-i lokti ayongzüker liasü.

SSU tir Vesiito D. Vadeo-i tir o jembia liasü.

SSU election commissioner Lehi Lohe-i kümsük 2022-2023 atema SSU lenirtem tasen shimtetba metetdakja liasü. Parnok rongnung Vetho Lohe tir asütsü aser Kiithono Ciikhamu tongti zülur asütsü.

Senden tembangba sentong nung Quiz tetoktepba agia liasü, kong Dozhoyi Ciikhamu, Assistant Jailor, District Jail Phek ya Quiz Master liasü.

Iba senden tenzüker sentong nung Zhoi Lohe, SDO (C) Phek ajanga "Focus on competitive exam" onük nungi jembia liasü.

## Manipur nung NPP Minister-i BJP nung aden

**Imphal, December 29, 2021 (Agencies):** Manipur nung Assembly elections atongtsü jakdang National People's Party (NPP) MLA Letpao Haokip-i Bharatiya Janata Party (BJP) nung denogo.

Haokip ya Manipur nung sports minister liasü.

Manipur aser Meghalaya nung NPP ya BJP den yaritepba telok ka süaka Bodhbarnü pai New Delhi nung BJP nung aden.

Meghalaya Chief Minister

aser NPP national president Conrad Sangma-i Manipur semdangba sülen anogo ka dang lir Haokip-i NPP toktsür BJP nung aden.

Haokip-i NPP toktsüba sülen Manipur nung NPP MLA asem dang kümogo.

Haokip dak alia BJP-i aniba Manipur sorkar nung NPP minister ji Deputy CM Yumnam Joykumar Singh dang lir.

Sangküm küm tetenzüklen Manipur Assembly elections agitsü akok.



92 buba Ao Kaketshir Mungdang (AKM) lungzüing anogo, AKM mezüing mimong mesemba bilemteta 29 Dec 2021 nü Longkhum yimdak AKM Golden Jubilee Monument anasa sentong tatsüka agir külen sentong nung adenertem külemi tangokba noksa nung angur. Longkhum, 29th December, 2021.



Bodbarnü Charaideo district kübok Shingritoli yim nung mapang matongdang asoba kinü tanur tasü mang ka anguba sülen nisungtem kanga aoksatepa liasü. Iba kinü tanur ya Rupan Gogoi aser Mamata Gogoi na indang liasü aser tenati ki tesülen ali tur arem ta yimdaklirtemi ashi. Iba osang angashiba sülen police-i kinü tanur tsüraburtem puogo.

### GMCH nung junior doctor temi lungkak ait

**Guwahati, December 29, 2021 (Agencies):** Delhi Police-i doctor tem dak teka sangshiba anema lungkak aitba pusema Bodbarnü Gauhati Medical College Hospital (GMCH) nung junior doctor temi lungkak aitogo. Delhi Police-i Delhi doctor tem dak tashiyim mapa inyakba aitsür ta Gauhati Medical College Hospital nung junior doctor temi ashi. Bodbarnep 8:00 ako nungi

nikongdang 3:00 ako tashi GMCH nung junior doctor temi lungkak aita liasü. NEET-PG counselling menua magiba atema doctor temi Supreme Court tashi rally ka agidang Delhi Police-i parnok apu. Chafdarjung Hospital dena sorkar mozü kitem nung resident doctor temi lungkak aitba manentsü telemtetba agiogo. Delhi Police-i Deobarnü

inyakba atema tezüluba nung tatok meshitsüla ta Delhi nung junior doctor temi takhangba agütsür. "Onoki doctor tem dang lungkak aitba agia moutettsü ta shiogo. Delhi nung Covid ajanga yellow alert metetdaksüogo aser DDMA Act kübok telok adenshitsu memelar" ta Delhi Police officer BS Yadav-i ashi. "Corona ajanga onoki doctor tem dang lungkak aitba anentsü mepishiogo" ta paisa ashi.

### Assam Congress-i Thengal Kachari Autonomous Council election atema candidate metetdaksü

**Guwahati, December 29, 2021 (Agencies):** Assam Pradesh Congress Committee (APCC) state president Bhupen Kumar Borah lenisüba kübok Thengal Kachari Autonomous Council election 2022 atema candidate mezüngbuba tarensen metetdaksüogo. Assam Congress-i constituency 22 nung 21 atema candidate tem tenüng metetdaksü. "Mapang tatsüka tsüngda constituency ka indang osang sangoktsütsü" ta APCC president Bhupen Kumar Borah-i ashi. Constituency balala atema shimtetba candidate tem: Nagabat Constituency (ST) - Sunil Regan; Borhola

Constituency (General women) - Bonti Bora Saikia; Madhapur Constituency (ST) - Anil Kachari; Phulbari Constituency (ST) - Ratul Saikia; Dihingla Constituency (ST) - Achinta Saikia. Titabar Constituency (ST) - Lakhyajit Hazarika; Samoguri Constituency (ST) - Akshay Jyoti Saikia; Baruaajan Constituency (ST) - Kanram Kachari; Jalukonibari Constituency (ST) Puneswar Saikia; Tamulbari Constituency (ST) - Lakheswar Hazarika; Thengal Komar Gaon Constituency (ST) - Bipin Bora. Gelabil Constituency (ST) - Hiranya Bora; Kachomari Constituency (ST women) - Jahnabi Saikia; Chawdang

Pathar Constituency (ST) - Chaya Thengal; Chawdang Pathar Doyang Constituency (ST) - Utpal Thengal; Bongalmora (Pub-Dikrong) Constituency (ST) - Krishna Hazarika; Pavo (Laluk) Constituency (ST)) - Mahendra Saikia. Lakhimpur East Constituency (ST Women) - Tulumoni Sonowal Borah; Bihpuria (South) Constituency (ST) - Raj Kumar Bora; Jakaipeluwa Hamoti Constituency (ST) - Apurba Hazarika; Ropohi Borgora Constituency (ST) - Mridu Paban Bora. Congress-i Merbil Naharkotia Constituency (ST) atema party candidate ano osang metetdaksüi lir.



1959 küm 14 buba Dalai Lama Tenzin Gyatso Tibet nungi India-i anir aruba nung shilem agrir Assam Rifles veteran Naren Chandra Das süogo. Das ya arishi küm 83 tain liasü. Iba mapang Dalai Lama ya arishi küm 22 tain liasü aser CIA indang Special Activities Division teyari ajanga pai March 30, 1959 nü Tibet toktsür jena arudang Assam Rifles sepai 7-i pa India lushii anir aru. (Guwahati, December 29)

**Piles Anepaluba** - H.Umar Chesam dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangü. Ajisüaka, tang H. Umar Chesam contact no. 9863758600 / 6909717178  
**State & National awardee H. Umar Chesam Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - Akhala, Dilong ward, Mkg.**

### Imphal nung bomb ka apok

**Imphal, December 29, 2021 (Agencies):** Manipur yimtiba Imphal nung improvised explosive device (IED) tesashi ka apok. Imphal kübok Telipati tesem nung IED ji tanep 3:30 ako meta apok. IED ji godown ka jakdang apok aser idanggi gate raksa. Ajisüaka iba lendong nung

nisung asüba mesüra yiruba osang kecha mali. Police-i iba tesemi forensic experts yok aser bushisingdang tenzüokogo. Iba osang zülu tashi nung telungpur telok shingaia tenüng agiba osang metetdaksü lir. December 15 nunga Imphal nungsa bomb tesashi ka apok.

### Jawahar Navodaya Vidyalaya kaketshir 12 dak COVID-19 putet

**Guwahati, December 29, 2021 (Agencies):** Assam nung COVID-19 tensa tamajungba akümer aser Bodbarnü Jorhat kübok Jawahar Navodaya Vidyalaya, Titabor nung kaketshir 12 densema nisung 19 dak COVID-19 putet.

Health department-i school nung tendangdang kaketshir aser school staff 19 dak putet. Kaketshir ajak home isolation atema yokogo aser school mozü agi merüktetogo. December 28 tashi nung nisung 120 dak COVID-19 putetogo.

### BSF-i Rs.1.48 crore alang Yaba süngjang apu

**Agartala, December 29, 2021 (Agencies):** Border Out Post Anandpur, Ex-150 Bn BSF, Gokulnagar-i Mongulbarnü Yaba süngjang 29,580 puogo. Indo-Bangladesh Border Fence anasa Rs.1.47 crore alangba Yaba süngjang apu. December 28 aser 29 ayaterm meta BSF sepaitemi Rs. 15,78,138 alangba mozütem

Külen, Border Out Post Srimantapur, Ex-133 Bn BSF, Gokulnagar-i Bangladeshi nunger nisung 4 aser India nunger ka apu. Parnokji Abdul Jalil (65 yrs), Helena Begum (52yrs), Baby Akhtar (55 yrs), Md Jakharia (05 yrs) aser Rafikul Islam (Indian) nunger ta jangaogo.

### Dy. Speaker Momin-i PSO magitsü molunga lir



**Guwahati, December 29, 2021 (Agencies):** Chief Minister Himanta Biswa Sarma-i Bharatiya Janata Party (BJP) lennirtem dang Personal Security Officers (PSOs) mamshitsü mepishiba sülen Assam Legislative Assembly Deputy Speaker Numal Momin-i pa indang PSOs ajak meyipa agütsütsü ta metetdaksüogo. Guwahati nung osangbener den jembidang Momin-i Assam nung security lendong kecha mali anunggi PSOs ajak meyipa agütsütsü ta ashi. "PSO cover magitsübaji kü nija telemtetba lir aser tangartemibo PSO cover maneni agitsü akok" ta pai ashi. Taoba mapang Sivasagar BJP unit president Mayur Borgohain aser Karimganj BJP

President Subrata Bhattacharjee nati tena indang PSOs toktsü. Chief Minister Sarma-i Bharatiya Janata Party (BJP) züngsemtem dang PSO cover toktsütsü ayongzükbaba sülen Barpeta MP Abdul Khaleque-ibo "Chief Minister-i tamasa pa indang PSO toktsüba sülen ang tangar dang ashitsüla" ta metetdaksüogo. "CM-i tangar dang security cover toktsütsü ashibaji junger saka tangar dang masüngdangdang pai tamasa PSOs toktsütsüla" ta Khaleque-i ashi. "CM Sarma-i PSOs ayuba ya Congress sobaliba ta ashir saka Congress lennir meyirjang aika PSOs maliba osang onoki nüma tanga ashir" ta MP Khaleque-i metetdaksü.



# TIR YIMYIM YIMOBILEM (EDITORIAL)

DIMAPUR

YANGTEPNÜ

LUCHII 30, 2021

## Telok onsara, mangatet ulura

**T**awa Mon district kübok Oting nung nisung meimchir taküm alitsü atema Tsüngremi agütsüba temeten anema tai maketba Naga nung tepseter India sepaitem nem tapet temerenshi agütsütsüla aser joko iba ama lendong mataloktsü asoshi Nagaland aser Northeast India nungi Armed Forces Special Powers Act, 1958 agientsüla ta takangba agütsürtem, Naga nung loki tentetem züngdangra, ashiko, lokti tentet telongjem ter dakbo talii India government dangi zülur asütsü. Item lokti tentet ajakji Naga nung aser India government nem agütsüba takangba onük aser taginüba kasa dang, ajisüaka Naga nung ajak longjem Naga nung tenüng nung zülur magütsütetba agi, kasa shiti, pei pei zülur agütsür. Iba jagi, India government nung ato kilonser aser kilo kilonser nati anir tatar yimsüsürtem mangmangya alitsüa akok. Ashi, iba ama asen lima nung asen nisung dak lendong timtem tulu atalokdangbo, Naga nung ajak telongjem sabang ka yangluteta maka-aka, iba tatalokba mechi nung, khen atema asüyonga, Naga nung ajak longjem India government dangi kasa takangba onüktemji shia zülubasa tashitaitba aser tajungba süla. Oting nung atalokba lendong anema Naga lima tesem ajaklen nübertemi ola adokogo, iba ola jagi Naga nung telongjem sabang ka tentetsü akanger. Ajisüaka, asenoki iba olaji mangateterr. Asenok Naga nungertemi lokti telongjem tentetsübo onsara jangrar, saka Naga nung ajak longjemtsübo mejanggar. Iba jagi asenok yimtak nungi shir pei kin tashi nung lokti telongjem tentet zünger mezüngma lir, saka pei pei sasep tilala nung longjemtsü bilemba dak alaka asen yim, asen kin aser asen lima atena oagi kasa Naga nungertem den longjem inyaktsüba jibo takoksa tulu angutsü amai bilemer. Ajisüaka, kasa Naga nung tebilemstü onük aser kasa taginüba onüktem shia Naga nung telok balalai kasa India tir mesüra kasa India ato kilonser aser kilo kilonser dangi züluba dang nungibo, Naga nung loki ajak tenüng enoka tezüluba ka nung kin aser lokti tentet ajaki sign ser agütsü tajungba aser tashitaitba süla. Atangji, longjem inyaktsüba jibo temenu maka, anungji Naga kin aser aser Naga nung loki tentet ajak longjem " Joint Action Committee" ka shimteter, India government nem takangba shiti takang ka agütsü nung dang, Indiai Naga nung akümstübutstü aser angatetsü. Naga nung tashimait aser shisatsü agi matongba tesemtemji telok telongjem ka maka, kasa onük nung süaka pei pei meten takangba agütsüba jibo dang masü, saka tang India sepai, talisa Assam Rifles purtem anema tejashi tulu sayuba mapang, tesem kar nungbo Naga nungertemi Assam Rifle purtem teyari agia sentong balala ayongzuka agibaji asütsü. Külen Naga nung loki tentetemi India sepaitemi Naga lima toktsür aotsü akanger, aser ano telok karibo India sepaitem den amalitep kenyongi malitsü aser teyaria kecha magitsü ta lemteta lir, saka ano külen Naga nung yimtsüng kar nung India sepaitemi medical camp katsür aser kar nung shisatokden sentong ayongzuka akar ta süra, Naga nung telok balalai India sepaitem anema ola adokba aser parnok den amalitep kenyongi makatsü lemtetbatemji India government matsüngdangbo menüdong akümer masü na? Asenok Naga nungertem ya lokti telongjem tentetsü jangrar dang ashi, mangatet ulura. Kodaser, ano India sepaitemi kshetba, tai maketba Naga nungertem temang aremba leper li dena tazü nung, asenok tang India sepaitem den ball asayatsü? Kodaser tang, kodamasü shirangyonga, India sepaitemi agütsüba mozü achitsü? Kechi mulungjang dener tang India sepaitemi shisatokden sentong ayongzuka akaba nung oa adentsü? AFSPA asen lima nungi agientsüla ta asüba ya magienyonga kecha masü ta bilemer asü? Tapu aika bilemyonga, asenok yamai telok tilala aika küma lemsar Naga nung asoshi India den jemi tashi majungtsü aser yimten tebilemstü ya kibong tebilemstü nung dang atemtsü. Asenokbo Oting nung atalokba ama tarutsü nungbo Naga lima nung mataloktsü atema Naga nung telok ajak longjem, kenbang obang ka ser, India tsüngdang nokdaktsüla. Shin nung ashi ama, "soruchiokba nunga nisung aika teka ira majunger." Iba tangatetba nung Naga nung ajak longjemdak menden ka mesemtetter, iba menden ajangaji Naga lima ajaklen Naga nung ajaki nem pei pei teinyaktsü metetdaktsütsü tim. Atangji, telok aika asüyonga kecha masü, saka tensa tia ajak nung Naga nungertembo kibong ka chir ama, tangatetba kasa asütsü tim. Aji oda, kodang Naga nung ajak kenbang obang ka ser ola agütsüdir, temetet, iba jagi India lima anokshitsü aser AFSPA onük yabo tilaka ama toktsür, Naga yimten onük memeteti latetadoker alitsü.

## OLEMSABANG

### Lokti taküm nung ochimashi mapa aser laishiba

Imtiwala Imchen

#### Okila

Tanü tensa nung lokti aser kija taküm nung ochi mashiba aikati angur, meteter aser jembir saka iba anema noktaksü tasü maiter. Ano arogo aser lokti balala sentepdak ochi jembitsü aser inyaktsü kanga sashia jembir saka atangji nungbo aiben kija taküm shia-i ochimashi maparen pei pei sasep nung inyaksem alir. Ibai ajanga ochi mashiba ya tanen maka (continuous cycle) metetsümonga inyakba temenen maparen ka akümer. Anungji YSS ajanga iba ochimashiba inyakym tali rajema angatetsü atema webinar ka "Lokti Taküm nung Ochimashi mapa aser Laishiba" onük nung amedaker ayongzük. Onük lemsar Rev. Dr. S. Temjen Imchen aser Mr. C. T Jamir ajanga onük den apet tatalokba balala nung amendaker, tesayuba tajung jenti agütsü. Onük jembiri lokti nung tebilemstü aser teinyaktsü aika lemsatapa, aser iba nungi tongtibang kar dang agiteta shisadangtsü asoshi zülur.

#### Lokti taküm nung ochimashi tera

Onük lemsar Rev. Dr. S. Temjen Imchen-i lokti taküm nung kudasür ochimashi adoker iba tebilemstü aika lemsatap. Tongmelang agi yamai:

a) Ali rongsen aginübayong yazü jembiba (Lies motivated by desire for more material gain)

"Ali rongsen aginüba agi nisungtemi tiyazu jembitsü mulungtetdaktsür" ta loktilibaren shisadanger mongin nisungtemi ashir. Iba tetezü kodang iba (ali-rongsen) penbuba jagi yazütsü mulungtetdaktsür, tangar kelakokdaktsütsü meranger aser nüburtem tai leni anir. Kodang nisungtemi pei tejangraba ajangzük atema tiyazü jembir, külakokdaktsüba jaklaji lokti yimya ka ama dang kümdaktsür. Tiyazü jembiba ya lokti nung menatapa aor, kechiba ta süra, kechi atalok ibaji tim mapa aser yimya amai bilemer. Item mulungsentsü, jakla aser yimya ya tanü asen Naga lokti/yimjak nung lenirtem jakla mesüka lir.

b) Ali rongsen aginüba yong teraksa mapa inyakba (Corruption motivated by a desire for material wealth)

"Ochimashiba agi lokti aser juri anatsütsülen mejungi menatapa ogo". Meimchir mulung aser shisatsü bushirtem (psychological scientists) teloki ashiba agi, tanü lokti nung/tendak süpokrem aser kulak-ketem mapa tulu nungi dokan tashi nung aouyatetba tashi nung rongsen tulu takoksa ajurubaji shisabulutsü ka lir. Saka iba dang nungi tebilemstü tulubaji loktiliba nem tsübudaktsüba jibo asütsü. Naga lima nungbo süpokrem dang masü, odi-odia dang sorkar tenzüker aser yimden yimsüsürtemi telok terenlok sen agiadokba aser tanga ochimashi mapa jenti inyakba angur. Nagaland state nung lokti aser nübur ochimashi aser teraksa mapa inyakba maparen kar repringdangdi:

#### 1. Nagaland state sorkar kübok ochimashi aser teraksa mapa

Iba onük nung ya asen state kübok politician-temi public sen chitsüba (public funds siphoned off by politicians) kar shisadangdi. Politician-tem ta süra Nagaland Legislative Assembly kübok elected representatives, Chief Minister nungi shir MLA tashi; Nagaland state kübok political party lenir aser teinyakertem ta angatetdi. State yimden aser sorkar yimsüsürtemi asen Nagaland state atema developmental project balala jenti centre (Govt of India) nungi mapang shia meshir aser agizüker, saka iba mapaji meinyaki miima sen dang chitsüba report aika lir. Tatishitsü agi, State Stadium Project (Dimapur), Nagaland State High Court Building Project (Kohima), Road Projects, Backdoor appointments, aser ano aika lir. Centre-ibo state nem sen sanction asür, saka state sorkar-i iba sen miima chitsür. Tanü Nagaland nung project aika foundation lung azünga yutsüba dak alaka meinyaker aser kar inyaktor tamakok nung yutsür. Kishi-kina state purbo kasa mapang nung building project tenzüka, parnokibo renemtet, Nagaland state dang kechi asü? Lokti nung ochimashi mapa agi asenok kangshir. Nagaland state sorkari ochimashi mapa inyakba kanga ajiteter. Yimsüsür aser sorkar mapang nung tulurtem, aser nübur ajaki kanga aroka bilemdangtsü mapangji tang ya lir.

#### 2. Backdoor appointments

Asen state sorkar kübok 'Backdoor appointments' employment sector nung tatalokba jenti ajangshia arudagi. Tejashitsüka, iba ya-a asen state employment sector tsütsülen nung ochimashi aser teraksa mapa ka lir. Osangcet aser ACAUT (Against Corruption and Unabated Taxation), RPP, Nagaland Tribal Union Chumoukedima Town (NTUCT), sangdong ajanga ashiba agi, aser tanü Nagaland state employment jenjang asadangeri ashiba agi, Police aser tanga departments nung 'tezülen-kishi ajanga mapai aiba' (backdoor appointment) nübur jenti lir. Ibai lokti nung ochimashi mapa tulutiba. Item külittem Ao Students' Union Dimapur (ASUD), NTUCT telok, Tenyimi Students' Union Dimapur (TSUD), Lotha Students' Union (LSU), The Janata Dal United (JDU) Nagaland aser ano aikati, 'tezülen-kishi ajanga mapai aiba' khenyongi anenjang ta ola osangcet balala nung agütsüba angutsü. State kübok alir lanur asensortem degree tajung ngur (ana aser talang nungi) aruagi service/mapa bushir. Saka noklang nung nisung ka-ana dak alaka, tanungba mirijangsa-mirijang educated unemployed tia-i idaktsür. Ibai tebilemstü tulu ta bilema, ochi-pukhüm nung na aser ni tasü itta noktaksüla.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Nepal nung pastor ka kum ana tepuokdak ayutsü obendang agütsü



Pastor, Keshab Raj Acharya'er kibong tangokba noksa nung angur.

**New Delhi, Luchii/December 29 (Agencies):** Nepal linük nung ken o balala asem nung pastor kati bail nung chioktsü atema aseben tashi sen aika agüja liasü, saka pa kum ana tepuokdak ayutsü obendang agütsüogo.

Nepal nung Dolpa District Court-i arrshi kum 33 pastor, Keshab Raj Acharya kum ana tepuokdak ayutsü obendang agütsüba den külemi pa dang dollar sen 167 senchi achi.

2018 kum August ita nung Nepal nung agizükba ozüng ka nung ajemdaker Pokhara nung aliba Abundant Harvest Church nung pastor, Acharya aitsü.

Pastor Acharya kinüngtsüi, November 30 nü obendang agütsütsü liasü saka November 22 nü aitsü aser kasa anogo nungjisa pa kasa jail nung puokbaji ni mamangteter, ta metetdaksü.

Osangbener den jembidang pastor kinüngtsü, Junu-i, "Ken o angadangtsü atema Keshab, kasa court-i oa liasü. Kasa anogo nungjisa pa aitsütsü aser kidangi meyipa marutsü ta onoki meimlai liasü. Pa apuba osang angashia onok kanga aoksa. Yamai ataloktsü ta ni bilema maliasü. Pai shinga kangshia tamangba yimsü memeyidaksü, anungji pa jail nung mepuoktsü ta ni bilema liasü," ta metetdaksü.

December 19, 2021 nü Pastor Acharya nem bail agütsüba sülen Hokolbarnü (December 24) pa kidangi arua liasü. Yaküm-a pa ita pezü tashi jail nung puoka liasü, iba sülen ken o balala asem nung sen aika agüja pa bail nung chioka liasü. Yaküm pai, sarasadem

## Khristmas anogo sülen Haryana nung Tenla ki ka bendoktsü

**Luchii/December 29, 2021:** India kübok Haryana state nung Khristmas anogo sülen December 26 nü mejangjaba nisungtemi Tenla ki ka bendoktsüogo; iba tatalokbaji police nem metetdaksüba sülen bushisüngdang tenzüko, ta International Christian Concern (ICC)-i metetdaksü.

"December 26 nikongdang 12:30 ako meta Ambala nung tebur ana Tenla ki temeket

ajanga coronavirus tashidak agi shirangertem aneptsü, ta osang tai prok, ta aija yaküm March 23 nü tepuokdak ayu saka April 8 nü chiok.

Ano ita ishika sülen, pai tanga yimsü amangertem melung yirutsür ta pa aija tanaben pua jail nung puokba sülen sen agüja July 3, 2020 nü bail nung chioka liasü.

Nepal nung Khristantem tansüdaksütsü atema sorkari pastor apu, ta shia pa kinüngtsüi, "Iba ya jelia asalentong yanglur inyakba lir, ibayongji pastor Keshab anema benokba ken o mapang talangka atsülanga aruogo. Parnoki tesem asemsü nungi pa arishi aser ken o mapang talangka angadanga aru," ta metetdaksü.

Nepal nung Khristan yimsü kanga renlokba ajanga Hindu yimsü alia amangertemi tetsübu nung Khristantem anema inyaker, ta laisa ashi.

"Khristan nütsüng tali renlok nungbo par yimsü (Hindu) samatsü ta parnoki tsüba bilemer, Pastor Keshab apuba aser aitsüba ya Khristantem dang tatishtsü sayutsü atema lir," ta lai ashi.

"Nisung kati, Pastor Keshab-i pa nem yimsü dak sendakba kaket ka agütsü aser pa dang Khristan yimsü agizükang ta ajungshi, ta pa nem tai tongloktü. Atangji pa Dolpa-i ao aser kaketter lema agütsü saka Khristan yimsü agizükang ta shinga majungshi mesüra sen amshia shinga memesüzük," ta laisa ashi.

"Ken o angadanga mapang nung Pastor anema kuli agütsütsü atema nisungbaji court-i maru, mesüra shingaia

telungi aiba sülen Yisu Khrista kürazyanglu densema Tenla ki raksatsü," ta Sadar Police Station nung Station House Officer Narseh-i metetdaksü.

"Tang tashi parnok maitsü mejangja saka iba tatalokba bushisüngdangtsü atema police teams nem mapa nungloktüogo. Aibelenertem anema ken o ka benokogo aser aibelenertem nem temerenshi agütsütsü," ta paisa metetdaksü.

pa anema kuli magütsü, saka iba ken o nung kechiba pai aitsüar ni süngmanger," ta ashi.

Nepal Christian Society nung general secretary, Rev. Dilli Ram Paudel-i, "Ketdangsertemi tejak repranga inyak asütsüa akok. Obendangeri kuli balala mangadang saka police report kija nung ajemdaker pastor aitsü," ta metetdaksü.

Obendanger jagi pastor atema ken o jembitsür attorney dang, nenoki iba obendang anema High Court nung ken o benoktsü akok ta shiogo, ta Junu Acharya-i metetdaksü.

Tang Nepal nung Khristan lenirtemi alima tesem balala nung Khristantem dang pastor atema ken o jembitsüsang yaridaksüner, ta mepishiogo.

High Court-i pa bail nung chioktsü atema Khristantemi sarasademtsüdar, iba denjji külemi iba ken o akoktsü atema senotsü bushidar.

## ANO GO ABEN TSÜNGREM DEN

### Nai Khrista den temulung asütsü akok

*Shibai ni tashi itdaksür Pa dak ni ajak inyaktsü akok. Filipi 4:13*


Filipi arogoi pa tenzüka mapa nung yariba asoshi Pauli parnok nem tenüngsang agüja zülü. Yangi pai nübur dang pelaa alitsü ashi (t.4), kecha atema shisa mebulutsü ashi (t.6) aser ochi, akhümtsübu aser shidakba nung temulung ayutsü ayongzük (t.8). Idangji pa nüngdak nung koda talubusa angu (rishikangshiba indang mejembi) iba indang ashi. Pai ashi, "Shibai ni tashi itdaksür Pa dak ni ajak inyaktsü akok." Pai kechi tetezü ashir? Pai inyaknüba ajak inyaktsü Khristai pa tashi itdaksür ta pai ashir asü ? Ibaji masü ! Pa peria akadang aser sensaka alidang Tsüngremi pa nem temulung süa lidaktsüba indang pai jembi.

Yisu tenüng tetshia nai inyaknüba inyaktsü iba tekong yagi ashir asü ? MASÜ ! Mapang tajung tamajung ajak nung Tsüngremi mulungba nai atalokdaksütsü Tsüngremi ne nem tashi agütsüba indang iba tekong yagi mejembir. Rishikangshi mapang nunga nai aremzüka Pai mulungba atalokdaksütsü akok. Kechi asoshi na aja iba nung rangloker nai tashi anga aser tamang agi apusora, nai takok angutsü, kechiaser Pai na tashi itdaksütsü. Khrista asoshi mapa kar inyaktsü na tashi nüngdakra Paul ama kumang, shibai tashi mait nunga temulung süa liasü.

"Aji asünung Khrista atema mekokmin nunga uludi" (2 Kor. 12:10).

Sarasadem : Oba, kü taküm nung Khrista aliba ajanga ni kechisarena nung temulung süa alitsü kü dang yariang. Amen.

## Khristan putir aser Nobel Peace Prize angusang, Desmond Tutu süogo



**December 29, 2021:** South Africa nung sentsü nung ajemdaker nisung bendangshidangba anentsüba nung tongti shilem agisang Khristan putir, Desmond Tutu alima nungi pilaogo; pa arrshi kum 90 liasü.

Tutu ya Africa nunger lenir, Nelson Mandela den kanga atongsema inyaker ka liasü.

South Africa Tir, Cyril Ramaphosa-i sangdong ka ajanga, "Tongti putir, Emeritus Desmond Tutu ya South Africa nunger nüchiso atema inyakertem rongnung ka liasü. Desmond Tutu ya linük meimer ka liasü; tangatetba tajung aliba lenir ka aser 'mapa medeni

tamangji tasi' ta Laishiba nungi asenok nem tesayuba agütsür lenir ka liasü. Tongti putir, Tutu tanela tesünep nung anisüngzüktsü saka pa tesayubatem ajanga tarutsü nunga asen linük maneni ajungshitsü," ta metetdaksü.

Tutu ya 1931 kum Klerksdorp nung aso aser 1954 kum University of South Africa nung graduate süa liasü. Pai kum asem tashi high school nung tesayur inyakba sülen theology azüng aser 1960 kum putir aküm. 1960s nungsa pai England nung theology maneni azüng aser 1970s nung England nungi meyipa aruba sülen theology institution ka nung

assistant director inyak.

1984 kum pa nem Nobel Peace prize agütsüba sülen pa kanga nüngtu aküm.

1985-86 kumtem nung pa Johannesburg nung putir inyak, iba sülen 1996 kum tashi Cape Town nung tongti putir inyaka liasü.

Desmond Tutu tasü mang anogo ananü ayutsü aser Küm Tasenba anogo (January 1) nung asüpila sentong agitsü.

Pa tasü mang anogo ka dang ayutsü sentong liasü saka nisung aikati pa nem akhüm agütsütettsü atema ano Brihostibar tashi atsülangogo, ta Tutu IP Trust aser Desmond & Leah Tutu Legacy Foundation-i metetdaksü.

Pa tasü mang St. George Tenla kidang ayutsü aser asüpila sentong agiba sülen tasü mang rongdoktsü aser mitsüji Tenla kidang ayutsü.

Tang coronavirus wara aliba nung ajemdaker pa den asüpila sentong nung nisung 100 tashi dang adentsü, ta Cape Town nung tongti putir, Thabo Makgoba-i metetdaksü.





December 29, 2021 nü New Delhi nung Union Minister, Gajendra Singh Shekhawat (ajichilen)-i Akali Dal lenir, Jagdeep Singh Nakai (tiyong) BJP party nung agizükdang tangokba noksa nung angur.

### India nung nisung 781 dak Omicron putetogo: Health Ministry

**New Delhi, December 29 (Agencies):** India nung anogo shia nisung aika dak coronavirus Omicron variant putetdar, ta Bodhbarnü Ministry of Health & Family Welfare-i metetdaksü.

Linük nung UTs aser state 21 nung nisung 781 dak Omicron putetogo aser iba nungjagi nisung 241 bo anepogo mesüra tangaleni ogo.

Delhi, Maharastra, Gujarat aser Kerala state tem nung nisung timba dak iba variant putetogo.

Tang tashi nung Delhi nung nisung 238 dak Omicron putetogo, Maharashtra nung 167, Gujarat nung 73, Kerala nung 65, Telangana nung 62, Rajasthan nung 46, Karnataka nung 34 aser Tamil Nadu nung 34 dak iba variant putetogo.

Haryana nung 12, West Bengal nung 11, Madhya

Pradesh nung 9, Odisha nung 8, Andhra Pradesh nung trok aser Uttarakhand nung 4 dak iba variant putet.

Maneni Chandigarh nung nisung asem, Jammu & Kashmir nung asem, Uttar Pradesh nung ana, Goa, Himachal Pradesh, Ladakh aser Manipur state tem shia nung nisung kaka dak Omicron variant putetogo.

Ministry of Health & Family Welfare-isa, tesüiba ghonda 24 tsüingda linük nung nisung 9,195 dak coronavirus putetogo aser tang tashi nung linük nung nisung 3,48,08,886 dak iba tashidak puteter; ano coronavirus agi teshirangdakpurtema timba-77,002 kümogo, ta metetdaksü.

Tesüiba ghonda 24 tsüingda coronavirus agi shiranger 302 süogo aser tang tashi nung India nung iba tashidak agi shiranger

4,80,592 süogo, ta kasa osang ajangasa metetdaksü.

Tang India nung anogo shia coronavirus positive putetba shilem 0.79 aser hopta shia positive putetba shilem 0.68 lir.

Tesüiba ghonda 24 tsüingda samples 11,67,612 tendanga liasü aser tang tashi nung samples ajak senteper crore 67.52 (67,52,46,143) tendangogo.

Tang tashi nung Centre sorkari states/UTs nem coronavirus vaccine dose crore 49.16 (1,49,16,36,985) agütsüogo aser tang states/UTs ket nung vaccine dose crore 16.67 (16,67,25,556) lir, ta Health Ministry-i metetdaksü.

Tesüiba ghonda 24 tsüingda linük nung vaccine dose 64,61,321 agütsüogo aser tang tashi nung vaccine dose ajak senteper crore 143.15 (1,43,15,35,641) agütsüogo.

### Jharkhand: two wheelers amshirtem atema petrol jenjang ajemtsü

**New Delhi/Ranchi, December 29 (Agencies):** Bodhbarnü Jharkhand Chief Minister, Hemant Soren-i motorbike aser scooter amshirtem dang petrol litre ka nung sen 25 tashi ajemer ayoktsü ta sangdongogo; sangküm January 26 nungi tenzüka two wheelers amshirtem dang petrol jenjang ajemer ayoktsü.

Bodhbarnü Jharkhand Chief

Minister office-i sangdong ka ajanga, "Petrol-diesel jenjang maneni atur, aser ibaji ajanga middle class aser sensakertem tamajungba kongshir. Ibayongji state sorkari two wheelers amshirtem dang petrol litre shia sen 25 ajemer ayoktsü telemtetba agiogo," ta metetdaksü.

State nung lokti senden ka agiba mapang Chief Minister-

ia, January 26 nungi two wheelers amshirtem dang petrol jenjang ajemer ayoktsü, ta metetdaksü.

India nung state timbaka nung petrol aser diesel naprong litre ka nung sen 100 dak tema liasü saka November ita nung Centre sorkari petrol aser diesel jenjang ajem, iba sülen state tema aikati totzü jenjang ajemer liasü.



December 29, 2021 nü Hubballi nung Karnataka Chief Minister, Basavaraj Bommai-i Shramik Sanjeevani Mobile Clinic Unit tenzüksüba noksa nung angur.

### PM Modi-i UAE semdangtsü aliba thinenogo

**New Delhi, December 29 (Agencies):** January ita tetenzüklen Ato kilonser, Narendra Modi-i United Arab Emirates (UAE) semdangtsü sentong liasü, ajisüaka tang alima nung coronavirus aser omicron variant tali prokba tebilemstü aliba nung ajemdaker iba sentong thinenogo.

January 6 nü Modi-i UAE sendanga yangji tongti lenirtem ajurutsü sentong liasü.

Taküm küm tetenzüklen-a Modi-i Portugal, France aser UK semdangtsü sentong liasü saka coronavirus wara ajanga thinen liasü. Yaküma pai Brussels semdangtsü liasü saka covid wara nung ajemdaker sentong thinen.

India nunga Delhi aser Maharashtra na nung nisung aika dak Omicron putetogo. Delhi nungbo kanga menüingdakba maparen ajak anentsüogo aser aonung 10:00 ako nungi anepdang 5:00 ako tashi curfew ozüing benokogo.

UAE nunga tawa nisung 1,800 dak coronavirurs putet aser tang tagidak Dubai expo-a

anentsüsa tensa kati bener arutsüogo. PM Modi-ia Dubai Expo nung India Pavillion semdangtsü sentong liasü saka thinen, ta osang angazüker.

Modi-i UAE semdangba mapang nung India-UAE Free trade agreement agitsü sentong liasü. India aser UAE na tsüingda 'Comprehensive Strategic Partnership' yangluba sülen iba partnership kanga renlokdar.

2015, 2018 aser 2019 kümtem nunga Modi-i UAE sendanga liasü, aser UAE-i Modi nem highest civilian award 'Order of Zayed' agütsüogo.

2016 küm February ita nung Abu Dhabi crown prince, Sheikh Mohamed bin Zayed Al Nahyan-ia India sendanga liasü aser 2017 küm India nunger Republic Day sentong nunga tongti tejaokerji Sheikh Mohamed bin Zayed Al Nahyan liasü.

UAE nung India nunger nütsüing aika lir, talisa, Kerala, Tamil Nadu aser Andhra Pradesh state tem nungi India nunger aika UAE nung oa lir.



December 29, 2021 anepdang Jabalpur nung aliba Narmada ayong nung bendanglen nungi aruba tzü-ozü aika aliba noksa nung angur. Item ozü ya asükwa mongpu nung Siberia nungi India-i arua amonger.

### JJ Act kübok Childcare homes ajak register asütsüla: NCPCR

**New Delhi, December 29 (Agencies):** National Commission for Protection of Child Rights (NCPCR)-i shidi ka ajanga West Bengal chief secretary dang, children care institutions (CCIs) ajak Juvenile Justice Act 2015 kübok register asütsüla, ta metetdaksü.

"2018 küm senden ka amenba dak sendakba bushisüingdangba ajanga, state sorkari tang tashi 'The Women's and Children's Institutions (Licensing) Act, 1956 amshir ta jangjaa liasü, saka ibaji tanurtem temeden dak sendakba tangatetbatem den meputep. Children care institutions (CCIs) ajak Juvenile Justice Act 2015 kübok register asütsüla," ta NCPCR-i metetdaksü.

Tang West Bengal nung CCI 245 tashi Juvenile Justice Act kübok register süa lir, anungji CCI ajaki JJ Act nung aliba ama inyaktsüla, ta shia NCPCR-i state sorkar dang

anogo 10 tsüingra report agüjang, ta metetdaksü.

"Commission-i state nung child care institution ka mita aoba mapang nung documents kar angu aser ibaji ajanga state nung CCI-i tang tashi Women's and Children's Institutions (Licensing) Act, 1956 kübok inyaker ta jangjaogo," ta NCPCR tongti, Priyank Kanoongo-i metetdaksü.

Kanoongo-isa, states/UTs ajak nung child care institutions-i JJ Act nung aliba temzüingtem beshitsüla, ta metetdaksü.

Centre sorkari foreign funds atema Missionaries of Charity indang licence renew asütsü memelaba sülen Khristantem aser West Bengal Chief Minister, Mamata Banerjee densema yimtenren lenirtemi ibaji anema ola adokba mapang nung NCPCR-i West Bengal chief secretary nem iba shidi agütsür.



Sydney nung aliba clinic ka nung COVID-19 tendangtsü atema nūburtem gari nung mener atatepba noksa ka yangi angur. Omicron variant prokshiba ajanga Australia nung coronavirus tashidak tali akumer. Sydney aser New South Wales temeket tesem kar nung iba tashidak ya nisung tasen 11,000 shi dak putetogo, kong anogo ka tejakdang nisung 6,000 dak puteta liasü.

## US aser Europe nung COVID-19 cases timba akumer

**Washington, Luchii/Dec. 29 (Agencies):** Coronavirus tashidak wara tenzükba sülen US aser European linük kar nung anogoshi iba tashidak puteta aruba rongnung tang timba akumer aser Omicron variant prokshia aor.

Hombarnü US nung nisung tasen 440,000 dak iba tashidak puteta liasü, ta health ketdangsürtemi ashi.

France, Italy, Greece, Portugal aser England nunga iba tashidak kanga sashia putet.

Christmas mapang osang menur agütsüba mechi tali ya putet alitsü akok, ta ketdangsürtemi ashi.

Taoba mapang kanga sashia prokshiba Delta variant dang nungi Omicron ya tashi maitba ta aikati ashir, saka kanga züba menatepa aoba Omicron tabu yagi cases tali kimdakja mozüki asüngtsü, ta tsübuteper.

Omicron yagi lendong tulu agütsütsü, ta World Health Organization (WHO) ajanga tekumdangtsü shia lir.

Bodhbarnü Poland nung COVID dak sendakba nung nisung 794 asü, koba wave pezübuba nung timtiba alitsü, kong iba tashidak agi menepa alir shilem pezü sadanger shilem asem mozü magi.

December 27 nü US nung US Centers for Disease Control and Prevention (CDC) ajanga bendenba nung cases 441,278 liasü - koba agency ajanga anogoshi cases bendenba nung timtiba alitsü.

2021 küm January ita nungi tenzükba anogo tenet asadanga aruba nung tang timba lir, ta CDC data tracker ajanga ashi.

Christmas mapang iba tashidak tendangba tesem shibangba aser ajema tendangba ajanga tang tesüsa putetba ya tali akumer asütsü akok aser küm tasen tenzükba sülen cases ya ajema akumtsü akok, ta CDC odongtari news site Politico dang ashi.

Europe linük talila kar nung senzüsemponger asoshi tekumdangtsü metetdaksüogo aser tashidak menatsü kanga mela lir ta asüba linüktem rongnung Malta, Moldova aser Sweden züngoksemogo.

CDC indang Level 4 telemsa kübok senzüsemponger dang item linük yagi maotsü ashir. Nisung 100,000 rongnung nisung 500 dak tema iba tashidak agi menepa CDC ajanga Level 4 telemsa ya agütsür.

Omicron yagi vaccine agir alir aser nisung ajak dak kongshitsü akok, ta US nung menatepa aoba tashidak nung takotet, Amesh Adalja-i BBC dang ashi.

"Anungji asenoki cases tali akumba angutsü. Anungji tongtipangtibaji asenoki iba tashidak ya kanga mela menaloka aotsü aliba nisungtem nungi pila ayutsüla... cases tasashi aser mozü kidang amungtsüsa shirangtsüpur dak asenoki rangloksüla."

WHO ajanga Mongulbarnü report ka adoktsüba nung December 26 matong tsüngta hopta nung Europe nung COVID tabu ajanga shilem 57 agi timba akumer aser America nung shilem 30 agi tali akumer, ta shia liasü.

Mongulbarnü France nung cases tasen 179,807 liasü, koba Europe nung anogoshi cases züngdangba nung timtiba alitsü.

January ita tenzükdang France nung anogoshi cases 250,000 tashi angutsü ta yimya ajak agi sayur, ta French Health Minister Olivier Véran-i tekumdangtsü ashi.

Mapang tamajungba ano maru, ta French Hospital Federation ajanga shiogo.

Hopta tetenzüklen Ato Kilonser Jean Castex-i tenokdangba tasen sangdonga liasü. COVID-19 tashidak asoshi vaccine agia aliba tali tashi itshitsü asoshi mozü

agisemba maparen tembangogo aser tang tashinung nisung million 23 dak tema iba mozü agia lir.

Italy nunga anogo ka nung cases timtiba ya 78,000 liasü, koba COVID wara tenzükter timtiba alitsü. Kasa mapang nisung 202 asü aser tang iba linük nung COVID agi asür nisung 136,753 kumogo. Portugal nunga cases tasen 17,172 liasü.

Greece nunga cases tasen 21,657 liasü aser England nung cases 117,093 liasü.

Paris, London aser Berlin densema yimti aika nung New Year benjongmung thiogo, saka sorkar kari linük ajunga nungbo tenokdangba ya magütsüner.

France aser England nung aliba nūburtem dang pei tekolok amshitsü ashi aser Spain yimtiba, Madrid nung küm tasen agizükba benjong amungtsü saka Puerta del Sol square nung nisung tajemba adenshidaktsütsü, ta ashir.

Italy nung kima agiba sentong tem nokdangogo aser nightclubs tem shibangogo saka juri adenshiba nung tenokdangba agüja mali.

## Sudan nung hon atoba tesem anenbanga nisung jenti asü

**Khartoum, Luchii/Dec. 29 (Agencies):** Hopta tatemlen Sudan indang West Kordofan province nung mamshi aliba hon atoba tesem ka anenbanga nisung jenti asü, ta sorkar meyong mining company ajanga ashi.

Sudanese Mineral Resources Company atema odongtar Ismael Tissou-i Bodhbarnü ashiba agi, iba lendong nung nisung 38 asü, anungji taoba mapang nisung 31 asü ta sangdonga aliba dak tali akumer.

Iba tesem nung ali agi nisung anenbanga aliba tejangja memetet, ta Tissou-i ashi.

Shibanger mamshi aliba

## Afghanistan nung tetsürtemi temeden meshir

**Kabul, Luchii/Dec. 29 (Agencies):** Afghan yimtiba nung tetsür telok ka tetsür temeden akumtsübuttsüla ta yimyim ayima jaja aser taoba mapang United States-i yariba sorkar tenzükba sepaitem tepsetba Taliban ketdangsüri mimshir, ta aitsü.

Mongulbarnü Kabul tiyong nung aliba mosque ka anasa tetsür 30 shi adenshi aser metre noklang ishika jaja "justice, justice" ta ayimtena liaser aser iba mapang Taliban sepaitemi anendaktsü, ta osang ka ajanga ashi.

Parnok jajaba tesemi osangbener aruba Taliban temi nokdangtsü merang, shirnok lanurtem aser talisa linük indang taoba sepaitem yimya balaka nung tepsetba anema adenshir, ta iba sentong asoshi social media nung jaokba nung shia liasü.

Taliban sepaitemi osangbener telok ka khen atema soita ayu aser noksa tangoker kar indang hadir meshia ayu, parnok indang camera nungi noksa indoktsür meyipa agütsü.

August ita nungi tenzükba Taliban-i yimsü süa arudang temelaba makai longkak aitba nokdanga arur aser parnoki yimsü asüba anema longkak aiter nokdang.

Taliban teloki sorkar atsüngdokba sülen ozüngi memelai nisung 100 dak tema tepsetba kuli tejangja lir, ta United Nations, Amnesty International aser Human Rights Watch ajanga pei-pe report nung shir hopta ishika lir longkak aitba ya ajurur.

"Ni alima dang shiner, Taliban dang nisung tepsetba anenang ta shiner. Onoki temeden aginer, onoki ochi obendangba aginer, onoki meimchir temeden aginer," ta longkak aiter kati ashi.

Longkak aiter Laila Basami-ola tulu adoka "Taliban temi mapa tamajung inyakba machine anendaktsütsüla" ta

ashi. Taoba mapang sepai inyaka alirtem aser atsüngdoker aliba sorkar nung taoba mapang mapa inyaka alirtem lendong nung lir aser Taliban-i August ita sangdongba 'general amnesty' nung aibelener, ta shia liasü.

Taliban yimsüsüba kübok tetsürtem nem tenokdangba balala agütsüba asoshia longkak aiter temi ola adoka liasü.

Hopta tatemlen sorkari tutuyuba tasen agüja tetsürtem meta talangi kinunger tebur medeni maotsü metetdakja liasü.

"Tetsür temeden ya meimchir temeden lir. Asenoki asen temeden wazüka ayutsüla," ta Koahistani-i ashi.

Kabul nungi Afghan Women's Network indang mendenpula, Mahbooba Saraji ashiba agi, iba mera tasenba yagi tetsürtem asoshi tetsükdaktsü agütsür, kechiaser tetsür aika parnok meiner senzütsüsa kinunger tebur mali.

"Ibai kuli tejangja makai tetsür nem tenokdangba agütsüba yimya ka dang lir," ta lai osangbener dang ashi.

Taliban lenirtem ya terabo teladakba amai sayutsü meranger aser parnoki tetsürtem ya school züngtetsü aser mapa inyaktetsü, ta ashi.

Taliban kübok tetsürtem asoshi kakat reju danga ama masü aser province aika nung parnok ya grade trok sülen school azüngtsü memelar, saka province ter dak tema nung school tem lapoka lir.

Mongulbarnü online nung video ka prokshiba nunga tetsür telok ka linük yimtiba nung longkak aita liasü. Parnoki tetsür nem shisaliok agütsütsü aser mapa inyaksü maongka agütsütsü takhangba agüja liasü.

Taliban sepaitemi mopung nung injang khalokja longkak aitba sentong tembang liasü.

mine ya linük yimtiba, Khartoum nungi south tsütsü kilometre 700 (mile 435) shi pilar En Nahud kübok Fuja yimtsüng nung lir, ta Sudanese Mineral Resources Company Limited ajanga Mongulbarnü Facebook nung post sütsü.

Darsaya mine nung 'shaft' kar chirep aser nisung asüba den külemi iba lendong nung yirur alir nisung ti mozü ki kati anir ao, ta yangji aliba osang ka ajanga ashi.

Iba mining company ajanga noksa kar post sütsüba nunga yimdklar tem iba tesem nung adenshia liasü aser takum alirtem mesüra nisung temang ngutetsü asoshi alu atoba gol

ana amenoka liasü.


Ano noksa kar nungbo nūburtemi asürtem aremthsü atema leper yanglua liasü.

Iba mine ya meshidak asüba mechi sendoka-doker liasü aser inyaksangshi kecha melidaktsütsü atema security force temi mapang kabo nüka liasü, ta company ajanga ashi. Ajisüaka sepaitemi iba tesem yutsür aoba sülen yangji aliba nisungtem hon atotsü arua liasü.

Ajisüaka iba mine ya kodang sendoka-dokar mashi.

Sudan nung hon atodak tesem nung iba ama lendong ya aiben ajurur, kong lendong nungi kumzüktsü mera magir.

## Pelaba Lemsateper



1927 - 20/12/2021

Onoki teti meima aliba, obala **Jongpongnungsang** (Longmisa), Ozü asüku mapang, kija- kibong, yimer- yimsanger, arogo, Alichen Longmisa Union aser tembaram shirnokisa onok dang aria bilema nübo, rongsen aser sarasadem agi nungita yariogo, nenok ajak dang onoki kanga pelar. Onoki kecha lepa magütsütetsü saka Tulusang Tsüngremi nenok ajak moajangma ta ozü tamang sarasadem.

- Temeim Chirnur, Semchir aser Kinungertem.



## LONGMISA BAPTIST AROGO

P.O. Mokokchung B.P.O. Longmisa  
Dist. Mokokchung : Nagaland.

## TENÜNGSANG AGÜTSÜR



Arishi piyong Kibuba tenzütsü molungteta Mr. Temsükaba Senso Missionary, Arogoi temolung lemteta ABAM dang asüngdangba ama ordination council shimsür mapang shitak nung maparen ajak tempanger December 19, 2021 nü ABAM ajanga ordained sütsüogo. Ordination Council Membretem, Rev. Lipok Pongen, Impur, Chairman, Rev. Temshi Pastor Changtongya Town B/A, Rev. Sangyula A/P (W) Mangmetong B/A, Rev. Temjenlemzüng Pastor Chuchuyimlang Town B/A, Rev. T. Akaba Pastor Longkhum B/A, parnok lenisüba nung tenzüker kibong Kibuba mapa asoshi bendanga yutsüba atema Arogoi tenzükertem aser ABAM dang pelaba lemsateper. Tsüngremi Rev. Temsükaba aser par kibong Kibuba wadang asoshi maneni moajangma.

**Kibubar Lu Nung,  
Rev. T. Toshi Pastor  
Longmisa Baptist Arogo**

## Pushpa: The Rise ajanga sen cr. 250 aazükogo

**Luchii/December 29, 2021 (Agencies):** Allu Arjun indang Pushpa: The Rise sayar box office nung mezüng hopta takok tulu anguba sülen, iba film ajanga audience tem maneni atsüa arudar. Pushpa sayar anogo 10 nung iba film yagi alizüng tasen tongtet.

Mongolbarnü, India box office nung Pushpa ajanga cr. 5.75 aazükogo. Bendanglen iba film ajanga \$3.6 million tema aazükogo. Tang alima tesem balala box office nungi Arjun indang Pushpa ajanga sen cr. 250 dak tema aazükogo.

Cr. 250 dak tema aazükba Tollywood film rongnung Pushpa ya pungobuba kümogo. Pushpa sayar mezüng hopta - box office (global) nung cr. 229

shi aazük. Film yanglurtemi Twitter nung kasa osang lemsatepa liasü. "Blockbuster #PushpaTheRise sayar mezüng hopta nung sen cr 229 (worldwide) aazükogo. Tanabuba hopta nunga #PushpaTheRise takok ngua odar," ta Pushpa yanglurtemi lemsatep.

Hamsini Entertainment sangdong ka ajanga angazükba agi, America nung iba film sayar anogo 10 tsüngda cr. 16.30 aazükba liasü.

Iba film takok anguba nüngtem nung sentong ka agiba mapang, actor Allu Arjun aser film director nati pei tebilemba lemsatepa liasü. Pushpa takok anguba atema Allu-i Sukumar nem tenüngsang agütsü.

## Thenyizumi Students Union pur lokti senden agiogo

**Thenyizu, Luchii/December 29, 2021 (TYO):** Bodhbarnü, Director of Technical Education, Government of Nagaland, Er Mhaseto Nakro-i alima kanga dang kara melenshia aoba indang tuteta jembiba mapang, pai lanurtem dang ayong ayonga/zübazülema melii tarutsü tajungba asoshi meranga inyaksü ayongzüka liasü, ta sangdong ajanga metetdaksü.

Thenyizumi Students Union (TSU) indang 68buba Lokti Senden nung Special Guest ama Er Nakro-i jembia liasü. Iba senden ya Multi-purpose Building, Thenyizu, Phek district nung agia liasü.

Nakro-i, tejakleni aotsü asoshi taküm nung ajuruba tayongzüka ajak ya tajemmetdak ama agizüktsüla aser bengdanga agütsür meranga inyak nungang takok ajangzüktetsü, ta shisem.

Sorkar mapa dak alaka tanga lenmang kecha mali ta mebilemsüla, saka taküm nung takok ajangzüktetsü asoshi nisung kati tayongzüka balala ajurtsü mulunga dang lira tawa tanü lokti nung mapa balala inyaksü asoshi lenmang angutsü, ta Nakro-i metetdaksü.

## Arjun Kapoor dak Covid-19 putet

**Mumbai, Luchii/December 29, 2021 (Agencies):** Bollywood actor Arjun Kapoor dak tanaben Covid-19 putet. Taoba küm September nung Arjun dak iba tashidak puteta liasü, ta sangdong ka ajanga metetdaksü.

Arjun dak Covid putetba osang ya Brihanmumbai Municipal Corporation (BMC) ajanga jangjatsü. Mumbai nung BMC puri Arjun'er ki shibangtsüogo aser sanitisation maparen tenzükogo. Arjun-i pa dak Covid-19 putetba dak sendakba nung osang magütsü.

Kasa mapang, Arjun'er kinunger Rhea Kapoor dak Covid-19 positive putet ta jangjaogo. Bodhbarnü film producer, Rhea-i Instagram sabang nung iba osang lemsatep aser la kinungbo Karan Boolani den külemi temang anepalua mungdar, ta shisem.

"Kinungbo künaprongla

Director Nakro-isa senden nung adenertem dang alima nung Information Technology (IT) kanga tejakleni aoba aser technology ajanga meimchir taküm nung temelenshi tulu adokdaksüba indang metetdaksü.

Iba dak sendakba nung Nakro-i, tsüraburtemi pei chirnurtem tejangraba angatetta ajungshitsü, pei (tsüraburtem) taküm nung ajangshibatam chirnurtem den lemsateptsü aser tesayuba tajunga agüja chirnurtem tim lenmang nung anitetsü asoshi ayongzüka liasü.

Chirnurtemi takok jenjang ajangzüktetsü asoshi parnok ajungmesotsü/nungitta yaritsü asoshi Nakro-i tsüraburtem dang mepishi. Iba den külemi kaketshirtem dang pei taküm jenjang metettsü, mapang shitak amshitsü aser tangar dang tatishtsü tajung sayutsü asoshi pai kaketshirtem ajungshia liasü.

Kasa mapang, Nakro-isa New Education Policy (NEP) indang mapatongtem telok dang metetdaksü. NEP ya takaratiba nung mapa kuma inyaksü aser iba mapatong agizüktsü asoshi tsürabur aser kaketshir tem dang renema alitsü atema pai ayongzü.

Iba senden tetenzüklen

Village Council Chairman (VCC) Thenyizu, Medothi Rhakho-i salem lemsatep aser kaketshirtem dang Tsüngrem akhüm tsübua tajungtiba inyaksü ajungshia liasü.

TSU President, Vekuto Kezo-i tir o jembia; Zuhvozolu Theyo ajanga Educational & Statistical report agütsü; Women Society Thenyizu ajanga sobaliba ken ka aten aser Yotolu Swuro-i ken ka aten.

Iba sentong nung HSLC examination nung temaba jenjang nung takok angur kaketshir 17 nem Lt Punuhu Dawhuo Memorial Award agütsüogo. Iba award atema taoba mapang minister, Thenucho Tunyi-i senotsü agüja liasü.

Kasa anogo nikongdang session nung Boduve Peter Resu, Judicial Magistrate, First Class, Dimapur-i o jembia liasü. Village Education Committee (VEC) Chairman, C Theyo-ia iba session nung jembigo.

2022 atema TSU indang team tasen sangdongogo, kong Nuzovo Dawhuo-i President, Vezhodulu Swiho-i Vice President, Nusakholu Dawhuo-i General Secretary inyaksü. Parnok den yariteptsü atema executive tem shimogo, ta kasa sangdong nung shia lir.

arur," ta ashi.

Rhea-i lar kidang party ana tashi ayongba sülen hopta ana lir la dak Covid-19 puteter asütsü. Tan ita tetenzüklen, Rhea-i lar medemer Kareena Kapoor, Karisma Kapoor, Malaika Arora, Amrita Arora aser tangar kar jaoka külemi chiyonga liasü.

Iba sülen anogo ishika lir, lai Masaba Gupta, Satyadeep Misra aser tangar ka jaoka Christmas party ayongzü. Iba party indang noksatem lemsatepba mapang, Rhea-i, iba party nung magidang parnok (tejaokertem) ajak negative tendangtet, ta lemsatepa liasü.

Tan ita tetenzüklen Kareena Kapoor aser Amrita Arora naprongla dak iba tashidak puteta liasü aser Christmas matongdang tenaprongla iba tashidak nungi taneptsü angu. Tawa, television star kar dak Covid-19 puteta liasü.



Taoba India ato kilonser Atal Bihari Vajpayee asoba anogomung bilemteta Bodhbarnü Tourist Lodge, Dimapur nung Sushasan Divas (Good Governance Day) amungdang tangokba noksa ka nung BJP Nagaland züngsemtem angur.

## ICC Men's T20I Player Of The Year atema nominee pezü sangdongogo

**Luchii/December 29, 2021 (Agencies):** Bodhbarnü, International Cricket Council (ICC)-i Men's T20 Cricketer of the Year Award atema Jos Buttler, Wanindu Hasaranga, Mitchell Marsh aser Mohammad Rizwan nung nominee pezü ama sangdongogo.

ICC Awards 2021 yagi taoba küm cricket nung tangar dang nungi alakteta shilem tajung agirtemjangiatettsü. T20 tsütsü reprangdangra, 2021 küm Pakistan wicketkeeper-batter Mohammad Rizwan ya asayar tetemjen ama asadangteter. Match 29 nung Rizwan-i run 1,326 (average 73.66 aser strike rate 134.89) yanglua lir.

Batting tsütsü junga asayaba dak alaka, wicket keeper ama Rizwan-i shilem tajung agia lir. ICC Men's T20 World Cup 2021 nung, Pakistan team semi final tongtetta asayatsü asoshi pai shilem tulu agi aser iba asayamung nung run timba yanglur rongnung pa tasembuba aküm.

Taküm, Sri Lanka nungi

Wanindu Hasaranga-i T20 nung spin bowler tajung ka ama asayaogo. Iba den külemi batting nunga pai külem team pur nungita yariogo.

Küm piyong asayamung balala nung shilem tajung agia arur sülen, UAE aser Oman kübok ayongba T20 World Cup nunga Hasaranga-i alakteta shilem tulu agiogo. Iba asayamung nung pai wicket 16 tashi agi aser Ireland o Sri Lanka asayadang pai run 71 yanglua liasü. T20 World Cup nung Hasaranga-i wicket timba agi.

Australia-i T20 World Cup takok anguba ya Mitchell Marsh lower order nung masü saka batting order No.3 nung pa atatsüba ajanga alitsü akok ta asadangteter. Taküm küm piyong iba format (T20) nung Australia atema pa ya batter tajungtiba liasü. Australia team-i West Indies aser Bangladesh den asayaba mapang, Marsh-i külem team pur kanga nungita yariogo. Iba sülen UAE aser Oman (T20 World Cup) nung team puri pa dak temulung lemtettsüa pai

asaya liasü.

Iba asayamung nung match trok nungi Marsh-i run 185 (average 61.66 aser strike rate 146.82) yanglutet. Australia aser New Zealand final asaya danga Marsh-i run 77\* yanglutet.

Maneni, England wicket-keeper Jos Buttler-a taküm junga asaya tenzük, kong team-i India madak anaben takok angu. England team-i Sri Lanka aser Pakistan den series asayaba mapang, match ajunga nung Butler-i masayatet yongjia, pai match kar nung alakteta shilem tajung agia liasü. Ibaji ajanga England team jenjang tajungba aküm aser T20 World Cup nunga England team nungi tongti batter ka ama pai Australia aser Sri Lanka den junga asaya.

Iba T20 World Cup asayamung nung pai run 269 yanglutet, koba T20 World Cup nung England team nungi run timba yanglur asayar rongnung pa aküm. Ajisüaka, tia makai semi final nung England-i New Zealand makokba ajanga parnok final metongtet.

## Mikel Arteta dak tanaben Covid-19 putet



**Luchii/December 29, 2021 (Agencies):** Arsenal manager, Mikel Arteta dak tanaben Covid-19 putet aser tan Honibarnü Manchester City aser Arsenal tsüngda Premier League asaya nung pa madentsü, ta Club-i ashi.

Arishi küm 39 tain Spain nung Mikel dak taoba küm (2020) March ita mezüing Covid-19 puteta liasü, koba ajanga English football thitsütsüsa kümadok. Aston Villa indang Steven Gerrard aser Crystal Palace nungi Patrick Vieira naprongla dak Covid-19 putetba sülen, tang Premier League nung Covid-19 puteter manager rongnung Mikel asütsü.

"Mikel Arteta dak Covid-19 putetba sülen, Honibar Manchester United den Premier League asaya nung pa madentsü. Sorkar tetuyuba nung anidaka Mikel anepaludar. Pa iba tashidak nungi yakta taneptsü angutsü asoshi sarasadentsür," ta Club-i lemsatet.

Mikel Arteta'er teloki tetoktepba ajunga nung tesüsa asayaba match pungoprongla takok ngur sülen table nung jenjang pezübuba tongteta lir.

Brehostibarnü press conference ka nung pai shilem agitsü imlar. "Iba osang (Covid-19 positive) ya tejashitsüka lir. Temang nung tashi maitba ajanga Covid-19 test agi. Iba wara nung taneptsü nguli dang maparen inyak tenzüksü," ta Arteta-i ashi.

Arsenal-i club' indang London Colney training ground shibangogo aser tawa Arteta den ajuruteper club staff ajak pei sasa quarantine asütsü.

Honibarnü, Assistant ana - Albert Stuivenberg aser Steve Round nati ketdangüsü Arsenal team asayatsü.

Deobarnü Gunners (Arsenal) puri 5-0 agi Norwich akokba mapang, coronavirus ajanga tongti asayar aikati masayatet. Team nung Covid-19 puteter rongnung Calum Chambers, Cedric Soares, Takehiro Tomiyasu aser Ainsley Maitland-Niles nung dena lir.

Wolves team nunga züngsem aika dak Covid-19 putetba ajanga Mongolbarnü Arsenal aser Wolves tsüngda Premier League asaya atsülangja liasü.

Mongolbarnü, England aser Wales nung nisung 130,000 dak coronavirus puteta liasü.

## Goa nung CR7 kürakyanglu ka amenokogo



**Panaji, Luchii/December 29, 2021 (Agencies):** Lanurtem ajungmesotsü aser state o linük nung football wadang temaba jenjangi ajungkettsü nükjidong nung Calangute, Goa nung Portugal nung football asayar mongin Cristiano Ronaldo indang kürakyanglu ka amenokogo.

Ronaldo indang kürakyanglu touzük seret 410 lir aser saisapong tsütsü lanurtem ajungmesotsü aser pei mangdang nung rangloker inyaksü ajungshitsü nükjidong nung iba kürakyanglu amenoker asütsü.

"India nung Cristiano Ronaldo indang kürakyanglu ka

mezüing amenoker asütsü. Iba ya tanga kecha atema masü, saka lanurtem ajungmesotsü atema lir. Football wadang temaba jenjangi tudaktsünüra, lanurtem (tetsür aser tebur) iba kürakyanglu ajanga ajungmesotsü," ta Goa minister Michael Lobo-i ashi.

"Sorkar, municipality aser panchayat temi infrastructure, football ground aser futsal ground agütsüner. Tetsür aser tebur tem pei sempet tajungba nung amshitsü atema infrastructure tajung nungdaker. Iba kürakyanglu ya parnok ajungmesotsü atema dang lir. Sorkar nungi infrastructure tajung aginür.

Saispong sempet tajung alir tetsür aser tebur tem training agütsütsü asoshi coach tajung nungdaker. Sorkari taoba mapang asayartem, shirnoki Goa atema asaya aser India nem tenüing tajung bener arutsüogo, item asayar ya coach ama mapa nung anioksüla. Iba ama inyak nungang saisapong wadang nung asenok tejakleni aotsü. Linük tulu süaka, football wadang tsütsü asenoki linük aika memenep lir," ta Lobo-i shisem.

Nisung kari iba kürakyanglu amenokba maparen anema noktaker aser linük nung saisapong tejakleni aoba mereprangner rongnung parnok ya asütsü, ta paisa ashi.

"Iba kürakyanglu amenokba maparen anema nisung kari aija jembiogo aser parnok ya football sempartem/maginürtem asütsü ta bilemer. Parnoki football ya saisapong tajung ka ama magizüker. Football yagi kin, nisung tereprangtsü aser tamangba yimsü kecha mebendanger; iba asaya ajanga ajak longjemdaksür. Ajisüaka, item nisung yagi wako tanak amer football anema noktaker," ta minister Lobo-i ashi.

Cristiano Ronaldo indang kürakyanglu jenjang sen lakh 12 asütsü aser tesüiba küm asem nungi iba maparen tenzük, saka Covid-19 wara ajanga iba maparen thitema aru.

## Indian Army Court of... (Tapak 1 nungi...)

**SIT-i sepaitem dang asüngdangyatsü:** Külen, Nagaland sorkari tentetba Special Investigation Team (SIT)-i Oting lendong nung shilem agiba sepaitem dang asüngdangyatsü asoshi temelaba angutsü.

SIT-i sepai shinga dang nungi kuli memeshi lir saka Brihostibar nungi parnoki shiba dang asüngdangya sünüdir temelaba angutsü ta Army osang ajanga ashi.

Iba lendong nung shilem agiba sepaitemji Assam kübok Jorhat nung aliba Rainforest Research Institute-i jaoktsü. Iba operation nung 21 Para Special Forces nungi sepai aser ketdangsur 30 tashi shilem agi ta osang angazüker. Parnok rongnung nisung 10 tema yiru aser nisung telok kati ka tepset.

**AFSPA agientsü atema**

**luden tentetogo:** Union Home Ministry-i December 26 nü Nagaland nungi AFSPA agientsü asadangtsü atema züngsem 6 agi akümba luden ka tentetogo.

Iba luden nung mendenbubaji Registrar General & Census Commissioner of India, Vivek Joshi lir aser Union Home Ministry Additional Secretary Piyush Goyal-i Member Secretary inyaksü.

Luden nung tanüngba züngsemtemji Nagaland Chief Secretary aser Director General of Police den Inspector General of Assam Rifles (North) aser Joint Director IB nung lir.

Parnoki ita asem tsüngda osang agütsütsü mapang atakzüksüogo. Nagaland nung June 30 nü AFSPA atsülanga liasü aser ibaji tasazük mapangji Dec. 31, 2021 nü tembangtsü.

## BILEMDANGANG

"Tzünglu arudang anü aputsü yongyabaji tamashi mapa."